



王臨川全集

國學自修讀本



上海新文化書社印行



臨川先生文集

卷十五

律詩

次韻唐公三首

東陽道中

山蔽吳天密。江蟠楚地深。浮雲堆白玉。落日寫黃金。渺渺隨行旅。紛紛換歲陰。強將詩詠物。收拾濟時心。

江行

材非當世用。轂有故人推。使節春冬換。征帆日夜開。南遊取于越。東望得州來。試盡風波惡。生涯亦可哀。

旅思

此身南北老。愁見問征途。地大蟠三楚。天低入五湖。看雲心共遠。步月影同孤。慷慨秋風起。悲歌不爲鱸。

烏塘

地僻居人少。山稠伏獸多。怒狸朝搏鴈。嘯虎夜窺騾。籬落生孫竹。門庭上女蘿。未應悲寂寞。六載一經過。

欲歸

水漾青天暖。沙吹白日陰。塞垣春錯莫。行路老侵尋。綠稍還幽草。紅應動故林。留連一盃酒。滿眼欲歸心。

發館陶

促轡數殘更。似聞雞一鳴。春風馬上夢。沙路月中行。笳鼓遠多思。衣裘寒始輕。稍知田父穩。燈火閉柴荆。

王村

曉謁王村路。春風北使旂。塵催輕騎走。寒咽短簫吹。攬轡聯貂帽。投鞭各酒卮。紛紛小兒女。何事倚牆窺。

長垣北

攬轡長垣北。貂寒不自持。霜風急鼓吹。煙月暗旌旗。騎火流星點。鷲桑亞戟枝。柴荆掩春夢。誰見我行時。

冬日

擾擾今非昔。漫漫夜復晨。風沙不貸客。雲日欲迷人。散髮愁邊老。開顏醉後春。轉思江海上。一洗白綸巾。

壬辰寒食

客思似楊柳。春風千萬條。更傾寒食淚。欲漲冶城潮。巾髮雪爭出。鏡顏朱早凋。未知軒冕樂。但欲老漁樵。

雨中

尙疑櫻欲吐。已恠菊甚漂。紫萸凌風怯。青苔挾雨驕。長閑故有味。多難自無聊。牢落柴荆晚。生涯付一瓢。

宿雨

綠攬寒蕪出。紅爭暖樹歸。魚吹塘水動。鴈拂塞垣飛。宿雨驚沙盡。晴雲晝漏稀。却愁春夢短。燈火著征衣。

乘日

乘日塞垣入。御風塘路歸。胡皆躍馬去。鴈却背人飛。煙水吾鄉似。家書驛使稀。忽忽照顏色。恨不洗征衣。

秋露

日月凋何急。荒庭露送秋。初疑宿雨泫。稍怪曉霜稠。曠野將馳獵。華堂已御裘。空令半夜鶴。抱此一端愁。

還自河北應客

媿客問謠俗。舊傳今自如。材難知驥馬。味美賽河魚。塞水移民久。川防動衆初。北人雖異論。時議或非疎。

將次洺州憩漳上

漠漠春風裏。茸茸綠未齊。平田鷗散啄。深樹馬嘶迎。地入河流曲。天隨日去低。高城已在眼。聊復解輕齋。

和仲庶夜過新開湖憶沖之仲涂共泛

水遠浮秋色。河空洗夜氛。行隨一明月。坐失兩孤雲。露髮此時溼。風顏何處醺。淹留各有趣。不比漢三君。自樂天有二處成孤雲之句。

送契丹使還次韻答淨因老

老欲求吾志。時方撫我華。強將愁出塞。空得病還家。日轉山河暖。風含草木葩。勝遊思一往。不敢問三車。

送吳叔開南征

慘袂不勝情。犀舟擊汰行。倦遊無萬里。惜別有千名。春草淒淒綠。江楓湛湛清。金陵多麗景。此去屬蘭成。

遊棲霞菴約平甫至因寄

渺渺林間路。蕭蕭物外僧。高陰涼易入。閑貌老難增。官時真傷錦。君恩更飲冰。求田此山下。終欲忤陳登。

和棲霞寂照菴僧雲渺平甫

蕭然一世外。所樂有誰同。宴坐能忘老。齋蔬不過中。無心爲佛事。有客問家風。笑謂西來意。雖空亦不空。

宜春苑

宜春舊臺沼。日暮一登臨。解帶行蒼蘚。移鞍一作鞍坐綠陰。樹疎蹄鳥遠。水靜落花深。無復增修事。君王惜費金。

春日

冉冉春行暮。菲菲物競華。鶯猶求舊友。燕不背貧家。室有賢人酒。門無長者車。醉眠聊自適。歸夢到天涯。

癸卯追感正月十五事

正月端門夜。金璫縹緲中。傳觴三鼓罷。縱觀萬人同。警蹕聲如在。嬉遊事已空。但令千載後。追詠太平功。

晚興和沖卿學士

刻刻風生晚。娟娟月上初。白沙眠綠驥。清浪浴鱗魚。竟欲從君飲。猶便讀其書。斜陽不到處。牆角樹扶疎。

秋興和沖卿

雲浮朝慘淡。風起夜颼颼。欲作冰霜地。先迴草樹秋。征人倚笛怨。思婦向砧愁。爲問隨陽鴈。哀鳴豈有求。

次韻沖卿除日立春

猶殘一日臘。併見兩年春。物以終爲始。人從故得新。迎陽朝剪綵。守歲夜傾銀。恩賜隨嘉節。無功祗自塵。

題友人郊居水軒

田中三畝宅。水上一軒開。爲有漁樵樂。非無仕進媒。槎頭收晚釣。荷葉卷新醅。坐說魚腴美。功名挽不來。

遊賞心亭寄虔州女弟

秀發千峰霧。清涵萬里秋。滄江天上落。明月鏡中流。眼與魂俱斷。身依影獨留。爲憐幽興極。不見爾來遊。

江亭晚眺

日下崦嵫外。秋生沆楊間。清江無限好。白鳥不勝閑。雨過雲收嶺。天空月上灣。歸鞍侵調角。回首六朝山。

金山寺

重經高處寺。一與白雲親。樹木有春意。江山如故人。幽軒含氣象。偏影落風塵。日暮臨歸去。徘徊欲損神。

揖仙閣

結閣揖仙子。疏塘臨隱扉。水花紅四出。山竹翠相圍。雲度疑耕下。鳬驚恐鳥飛。蜀鞭寧可恃。投釣此忘歸。

舟夜卽事

火距臨遙岸。餘光照客船。水明魚中餌。沙暖鷺忘眠。感慨無窮事。遲回欲曉天。山泉如有意。枕上送潺湲。

何處難忘酒二首擬白樂天作

何處難忘酒。英雄失志秋。廟堂生薜藋。巖谷死伊周。賦斂中原因。干戈四海愁。此時一無恙。難遣壯圖休。

二

何處難忘酒。君臣會合時。深堂拱堯舜。密席坐皐夔。和氣襲萬物。歡聲連四夷。此時無一盞。眞負鹿鳴詩。

送孫子高

蕩漾江南客。融怡席上珍。一罇相別酒。千里獨歸人。客路貧堪病。交情遠更親。自慙兒女意。失淚滴衣巾。

送董傳

悠悠隴頭水。日夜向西流。行路未云已。歸人空復愁。文章合用世。顏髮未驚秋。一聽秦聲罷。還來上國遊。

寄深州晁同年

秀色歸荒隴。新聲換氎毛。日催花藥急。雲避鴈行高。駐馬旌旗暖。傳觴鼓吹豪。班春不知負。短髮爲君搔。

白雲然師

白首一山中。形骸槁木同。苔爭庵徑路。雲補衲穿空。塵土隨車轍。波濤信土工。昏昏老南北。應謝此高風。

自白土村入北寺二首

木杪田家出。城陰野逕分。溜渠行碧玉。畦稼臥黃雲。薄糲胭脂染。深荷水麝焚。夕陽人不見。雞鷲自成羣。

二

雨過百泉出。秋聲連衆山。獨尋飛鳥外。時渡亂流間。坐石偶成歇。看雲相與還。會須營一畝。長比聽潺湲。

題朱郎中白都莊

蕭瀟桐廬守。滄洲寄一廬。山光隔釣岸。江氣雜炊煙。藜杖聽鳴鷓。藍輿看種田。明時須共理。此興在他年。

史教授獨善堂

湖海十年舊林塘三畝餘。靜非談者隱。貧勝富人居。列鼎亦何有。幅巾聊自如。猶應不獨善。學子滿階除。

寄福公道人

帝力護禪林。滄洲側布金。樓依水月觀。門接海潮音。開士但軟語。遊人多苦吟。會同方丈宿。燈火夜沉沉。

身閑

身閑宜晚食。歲晏忌晨興。人自嘲便腹。吾方樂曲肱。睡蛇雖不去。夢虺已無憑。寄語中林客。思禪病未能。

還家

還家豈不樂。生事未應閑。朝日已復出。征鞍方更攀。傷心百道水。闔目萬重山。何以忘羈旅。脩然醉夢間。

題湯泉壁示諸子有欲閑之意

吟哦一水上。披寫衆峯間。偶運非彭澤。留名比岷山。君才今禹稷。家行古原顏。平世雖多士。安能易地閑。

和唐公舍人訪淨因

西城方外士。傳法自南華。高蹈玩一世。旁通兼數家。來遊仁者淨。傳詠正而葩。乘興何時載。還能託後車。

沂溪懷正之

故人何處所。天角浪漫漫。寂寞斷音驛。徘徊愁肺肝。世情紛可怪。旅況浩難安。願化東南鵠。高飛託羽翰。

答許秀才

高陽有才子。負笈求晨饋。所趣少知者。其辭多慨然。樵妻意謝絕。漂母嘗哀憐。尙友古之人。于今猶壯年。

律詩

次韻景仁雪霽

新聲生屋霤。殘點着垣衣。委翳無多在。飄零不更飛。坳中餘宿潤。暖處自朝暉。稍見青青色。還從柳上歸。

次韻范景仁二月五日夜風雪

何知此邂逅。談笑接清揚。對雪知春淺。回燈惜夜長。密雲通炫晃。殘月墮冥茫。故有臨邛客。抽毫興未忘。

次韻冲卿過睢陽

宮廟此神鄉。留親泊楚艫。天開今壯麗。地積古悲涼。不改山河舊。猶餘草木荒。還聞足賓客。誰是漢鄒陽。

答冲卿

風作九衢黃。南窗坐正涼。破瓜青玉美。浮薺白雲香。詩懶猶能強。官閑肯便忘。賢愚各有用。尺寸果誰長。

得書知二弟附陳師道舟上汴

兒童聞太丘。邂逅兩心投。與汝今爲伴。知吾不復憂。園桃已解萼。沙水欲驚舟。一見南飛鴈。江邊肯更留。

初憩和州

衣足一囊弊。粟餘三釜陳。猶依食貧地。已媿省煩人。塵土病催老。風波愁過春。詩書今在眼。還欲討經綸。

瘡起舍弟尙未已示道原

側足呻吟地。連蔓瘡瘡秋。窮鄉鑿自絀。小市藥難求。肝膽疑俱破。筋骸漫濁瘳。慚君遠從我。契濶每同憂。

送杜十八之廣南

東南炎海外。尋訪又輸君。過嶺猿啼暖。貪程馬送曛。清談消瘴癘。秀句起煙雲。及公領鄉薦。朝廷尙右文。

崑山慧聚寺張祐韻

峯嶺互出沒。江湖相吐吞。園林浮海角。臺殿擁山根。百里見漁艇。萬家藏水村。地偏來客少。幽興祗桑門。

吳江

莽莽昔登臨。秋風一散襟。地留孤嶼小。天入五湖深。柑橘無千里。魚鰕有萬金。吾雖輕范蠡。終欲此幽尋。

江

靈源開闢有。羸縮但相隨。逆折山能礙。奔流海與期。泥沙拆蚌蛤。雲雨暗蛟螭。欲問深何許。馮夷祗自知。

江南

江南春起柂。秋至尚波濤。問舍才能定。呼舟已復操。行歌付浩蕩。歸夢得蕭騷。冉冉欲何補。紛紛爲此勞。

賈生

漢有洛陽子。少年明是非。所論多感概。自信肯依違。死者若可作。今人誰與歸。應須蹈東海。不但涕沾衣。

還白舅家書所感

行行過舅居。歸路指親廬。日苦樹無賴。天空雲自如。黃焦下澤稻。綠碎短樊蔬。沮溺非吾意。憫嗟聊駐車。

世事

世事一何稠。論心日已偷。尚蒙今士笑。宜見古人羞。老圃聊須問。良田亦欲求。非關畏黻冕。無責易身修。

寄純甫

塞上無花草。飄風急我歸。梢林聽澗落。卷土看雲飛。想子當紅藥。思家上翠微。江寒亦未已。好好著春衣。

招丁元珍

默默不自得。紛紛何所爲。晝漫聊取食。獵較且隨時。秋入江湖暗。風生草樹悲。黃花一杯酒。思與故人持。

遊杭州聖果寺

登高見山水。身在水中央。下視樓臺處。空多樹木蒼。浮雲連海氣。落日動湖光。偶坐吹橫笛。殘聲入富陽。
京兆杜嬰大醇能讀書。其言近莊。其爲人曠達而廉清。自託於醫。無貴賤請之。輒往。卒也以詩二首傷之。

蕭琴野衣巾。能忘至老貧。避囂依市井。蒙垢出埃塵。接物工齊物。勞身恥爲身。傷心宿昔地。不復見斯人。

二

叔度醫家子。君平卜肆翁。蕭條昨日事。髣髴古人風。舊宅雨生菌。新阡寒轉蓬。存亡誰一問。嗟我亦窮空。

江上

潮連風浩蕩。沙引客淹留。落日更清坐。空江無近舟。共看葦葦宅。聊卽稻粱謀。未敢嗟艱食。凶年半九州。

二

書自江邊使。鄉鄰病餓稠。何言萬里客。更作百身憂。補敗今誰卹。趨生我自羞。西南雙病眼。落日倚扁舟。

夏夜舟中頗涼因有所感

孤桐

扁舟畏朝熱。望夜倚桅檣。日共火雲退。風兼水氣涼。未秋輕病骨。微曙浣愁腸。堅我江湖意。滔滔興不忘。

遲明

天質自森森。孤高幾百尋。凌霄不屈己。得地本虛心。歲老根彌壯。陽驕葉更陰。明時思解慍。願斲五絃琴。

陪友人中秋夕賞月

欹枕浩無情。蕭蕭獨遲明。霜繁紅樹老。雲淨素蟾清。倦鵲猶三市。寒雞未一鳴。故山何處所。應有曉猿驚。
海霧看如洗。秋陽望却昏。光明疑不夜。清瑩欲無坤。掃掠風前坐。留連露下蹲。苦吟應到曉。況有我思存。

憤縣修路者

畚築今三歲。康莊始一修。何言野人意。能助令君憂。勦力非無補。論心豈有求。十年空志食。因汝起予羞。

河勢

河勢浩難測。禹功傳所聞。今觀一川破。復以二渠分。國論終將塞。民嗟亦已勤。無災等難必。從衆在吾君。

送河間晁寺丞

公孫富文墨。名字世多知。談笑取高第。弦歌當此時。臨河薪石費。近塞繭絲移。緩急常愁此。看君有所爲。

暮春

春期行晚晚。春意賸芳菲。曲水應修禊。披香未試衣。雨花紅半墮。煙樹碧相依。悵望夢中地。王孫底不歸。

遊北山

攬轡出東城。登臨日暫明。煙雲藏古意。猿鶴弄秋聲。客坐苔紋滑。僧眠樾蔭清。賞心殊未已。山下日西榮。

吳正仲謫官得故人寄解以詩謝之余次其韻

越客上荆舠。秋風憶把螯。故煩分巨跪。持用佐清糟。飲量寬滄海。詩鋒捷孟勞。甘餐飽觴詠。餘事付鉤陶。

陳師道宰烏程縣

嘗聞太丘長。德不負公卿。墟墓今千載。昆雲亦一城。本懷深閉蓄。餘論略施行。故自有仁政。能傳家世聲。

冬至

都城開博路。佳節一陽生。喜見兒童色。歡傳市井聲。幽閑亦聚集。珍麗各攜擎。却憶他年事。關商閉不行。

湯泉

寒泉詩所詠。獨此沸如烝。一氣無冬夏。諸陽自廢興。人游不附火。蟲出亦疑冰。更憶驪山下。歎然雪滿脰。

讀鎮南邸報癸未四月作

賜詔寬言路。登賢壯陸康。相期正在治。素定不煩占。衆喜夔龍盛。予虞絳灌儉。太平詎可致。天意慎猜嫌。

擬和御製賞花釣魚

雪暖簾萊日。風酣太液春。水光承步輦。花氣入鈎陳。伏檻留清蹕。傳觴屬從臣。霏香連釣餌。落葉亂游鱗。鑄飲恩知厚。衢樽賜願均。更看追夏諺。先此詠逢辰。

和吳冲卿雪霽紫宸朝

虎士開闔闔。雞人唱九霄。雲移銀闕角。日轉玉廊腰。籌動川收潦。靴鳴海上潮。舞袍沾宿潤。拜笏擁殘飄。賜飲人何樂。歸嘶馬亦驕。低徊但忘食。吟詠得逍遙。

和吳冲卿集禧齋祠

緘封祝辭密。占寫御名真。帝坐遙臨物。星圖俯映人。風含煙外節。月點霧中茵。沈蕡升煙遠。槐檀取燎新。羽衣歸寂寞。金鑊立逡巡。卻想來時路。還疑隔一塵。

送周都官通判湖州

綠水烏程地。青山顧渚濱。酒醪猶美好。茶薺正芳新。聚泛樽前月。分班焙上春。仁風已入俗。樂事始關身。橘柚供南貢。楓槐望北宸。知君白羽扇。歸日未生塵。

雙廟張巡許遠

兩公天下駿。無地與騰驤。就死得處所。至今猶耿光。中原擅兵革。昔日幾侯王。此獨身如在。誰令國不亡。北風吹樹急。西日照窗涼。志士千年淚。泠然落奠觴。

和子瞻同王勝之游蔣山並序

子瞻同王勝之游蔣山有詩。余愛其峯多巧障日。江遠欲浮天之句。因次其韻。
金陵限南北。形勢豈其然。楚役六千里。陳亡三百年。江山空幕府。風月自旣船。主送悲涼岸。妃埋想故蓮。臺傾鳳
久去。城踞虎爭偏。司馬墻廟域。獨龍屑塔顛。森疎五願木。蹇淺一人泉。稅杖窮諸嶺。蓋輿罷半天。朱門園淥水。碧
瓦第青煙。墨客真能賦。留詩野竹娟。

送鄆州知府宋諫議

盛世千齡合。宗工四海瞻。天心初籲俊。雲翼首離潛。德望完圭角。儀形壯陛廉。徐鳴蒼玉佩。盡校碧牙籤。綸掖清
光注。鑾坊茂渥霑。文明誠得主。政瘼尙煩砭。右府參機務。東塗贊景炎。廟談資石畫。兵略倚珠鈴。坐鎮均勞逸。齋
居養智恬。謳謠喧井邑。惠化穆蒼黔。進律朝章舊。疏恩物議僉。通班三殿邃。徙部十城兼。申甫周之翰。龜蒙魯所
詹。地靈奎宿照。野沃汶河漸。首路龍旗盛。提封虎節嚴。賜衣纓紫艾。衛甲綴朱綬。海谷移文省。谿堂燕豆添。班春
回紺轡。問俗卷彤襜。舟楫商巖命。熊羆渭水占。治裝行入覲。金鼎重調鹽。

見遠亭上王郎中

高亭豁可望。朝暮對谿山。野色軒楹外。霞光几席間。樹侵蒼靄沒。鳥背夕陽還。草帶平沙濶。烟籠別戍閑。圓畦荷
氣合。田徑燒痕斑。樵笛吟晴塢。漁帆出暝灣。登臨及芳節。宴喜發朱顏。夾砌陳旌旆。褰簾進佩環。觀風南國最。應
宿紫宸班。康樂詩名舊。蕪音詎可攀。

卷十七

律詩七言八句

歲晚懷古

先生歲晚事田園。魯叟遺書廢討論。問訊桑麻憐已長。按行松菊喜猶存。農人調笑追尋壑。稚子歡呼出候門。遙謝載醪祛惑者。吾今欲辯已忘言。

段約之園亭

愛公池館得忘機。初日留連至落暉。菱暖紫鱗跳復沒。柳陰黃鳥囀還飛。徑無凡草唯生竹。盤有嘉蔬不采薇。勝事園州雖或有。終非吾土豈如歸。

又段氏園亭

欲眠隨水轉東垣。一點炊煙映水昏。漫漫芙蕖難覓路。脩脩楊柳獨知門。青山呈露新如染。白鳥嬉游靜不煩。朱雀航邊今有此。可能搖蕩武陵源。

回棹

柴荆散策靜涼颿。隱几扁舟白下潮。紫磨月輪升靄靄。帝青雲幕卷寥寥。數家鷄犬如相識。一塢山林特見招。尙憶木瓜園最好。興殘中路且回棹。

醺醺金沙二花合發

相扶照水弄春柔。發似矜夸斂似羞。碧合晚雲霞上起。紅爭朝日雪邊流。我無丹白知如夢。人有朱鉛見卽愁。疑此冶容詩所忌。故將樛木比綢繆。

次韻公闢正議書公戲語申之以祝助發一笑

故人辭祿未忘情。語我猶能作扞城。身不自遭如貢薛。兒應堪教比韋平。老熊豈得長高臥。雛鳳仍聞已間生。把盞祝公公莫拒。緇衣心爲好賢傾。

次韻致遠木人洲二首

迷子山前漲一洲。木人圖志失編收。年多但有柳生肘。地僻獨無茅蓋頭。河側鮑生乾尙立。江邊屈子槁將投。未妨他日稱居士。能使君疑福可求。

二

杙爾何年客此洲。飄流誰棄止誰收。無心使口肝使目。有幹作身根作頭。暴露神靈難寄託。禱祠村落幾依投。紛紛翦紙眞虛負。立槁安知富可求。

次韻酬龔深甫二首

恩容楚老護松楸。復得一龔從我遊。講肄劇談兼祖謝。舞雩高蹈異求由。北尋五柞故未慙。東挽三楊仍有樛。陟嶽降原從此始。但無瑤玉與君舟。

二

握手東岡雪滿蓼。後期惆悵老吳蠶。芳辰一笑眞難值。暮齒相思豈久堪。他日杜詩傳渭北。幾時周宅對漳南。百年邂逅能多少。且可勤來共草菴。

次葉致遠韻

生涯聊占水中洲。豈即乘桴逐聖丘。身與鳬飛仍鴈集。心能茅靡亦波流。由來杞梓常先伐。誰謂菰蒲可久留。乘興吾廬知未厭。故移脩竹擬延騶。一作知君聊占水中洲。去即東浮逐聖丘。憂國無時須問舍。得坻有興即乘流。由來要路當先據。誰謂窮鄉可久留。他日五湖尋范蠡。想能重此駐前騶。

次韻酬朱昌叔五首

點也自殊由與求。既成春服更何憂。拙於人合且天合。靜與道謀非食謀。未愛京師傳谷口。但知鄉里勝壺頭。嗟予老矣無一事。復得此君相與遊。

二

去年音問。滁州百謫難知。亦我憂。前日杯盤共江渚。一歡相屬豈人謀。山蟠直瀆輸淮口。水抱長干轉石頭。乘興舟輿無不可。春風從此與公遊。

三

烏榜登臨興未休。共言何許更消憂。聯裾蕭寺尋真覺。方駕孫陵弔仲謀。語罷每開歡笑口。詩來仍掉苦吟頭。已知軒冕真吾累。且可追隨馬少游。

四

白下門東春水流。相看一噓散千憂。穿梅入柳曾莫逆。度壑緣岡初不謀。世事但如吹劍首。官身難即問刀頭。長臨鍛竈真自苦。有興復來從我遊。

五

樂世閑身豈易求。巖居川觀更何憂。放懷自事如初服。買宅相招亦本謀。名譽子真矜谷口。事功新息困壺頭。知君於此皆無累。得追騎墮壞塢遊。

次韻程給事知越州

千騎東方占上頭。如何誤到北山遊。清明若視蘭亭月。暖熱因忘蕙帳秋。投老始知歡可惜。通宵豫以別爲憂。西歸定有詩千首。想肯重來賁一丘。

次韻徐仲元

投老逍遙祀典堂。天刑真已脫桁楊。緣源靜翳無魚忿。度谷深追有鳥頑。每苦交游尋五柳。最嫌尸祝擾庚桑。相看厭唯夫子。風味真如顧建康。

詩奉送覺之奉使東川

三秋不見每惓惓。握手山林復悵然。後會敢期黃耆日。相看且度白鷄年。畏途石棧王尊馭。榮路金門祖逖鞭。一代官儀新藻拂。得瞻宸宇想留連。

次韻奉酬覺之

久知乘傳入西州。鷄黍從容本不謀。戶外驚塵尺書至。眼中飛浪片帆收。山林病骨煩三顧。湖海離腸欲萬周。尙有光華賁岑寂。篋中佳句得長留。

送程公闢得謝歸姑蘇

東歸行路嘆賢哉。碧落新除寵上才。白傅林塘傳畫去。吳王花鳥入詩來。唱酬自有微之在。談笑應容逸少陪。少保元絳謝事居姑蘇。又王中甫善歌詞。與相唱酬燕集。除此兩翁相見外。不知三徑爲誰開。

送項判官

斷廬洲渚落楓橋。渡口沙長過午潮。山鳥自呼泥滑滑。行人相對馬蕭蕭。十年長自青衿識。千里來非白璧招。握手祝君能強飯。華簪常得從雞翹。

次韻張德甫奉議

知君非我載醪人。終日相隨免汙茵。賞盡高山見流水。唱殘白雪值陽春。中分香積如來鉢。對現毗耶長者身。誰拂定林幽處壁。與君圖寫繼吾真。

北山三詠

寶公塔

道林眞骨葬青霄。宰塔千秋未寂寥。寶勢旁連大江起。尊形獨受衆山朝。雲泉別寺分三徑。香火幽人止一瓢。我